

In ricuart di Marzi Strassolt

ENRICO PETERLUNGER, ANTONINO MORASSI

Marzi Strassolt al è stât une figure une vore impuartante a pro dal Friûl e plui in gjenerâl pe Comunitât furlane.

Come Retôr de Universitât dal Friûl, al à dât continuitât al impegn dal so predecessôr Frilli, slargjant e rinfuarcint lis facultâts e dant ae istituzion une valence complete tal confront dal teritori e de societât furlane, azion che e je stade daspò puartade indevant cun convinzion dai Retôrs Honsell, Compagno e De Toni.

Dute la sô opare e à simpri vût come riferiment e obietîf chel di tignî dongje il Friûl e di lavorâ par mantignî la sô identitât, lenghistiche ma ancje culturâl intun sens plui ampli. Dut câs, nol à dome consolidât posizions za afermadis. Lui al à simpri viert gnovis sfidis, definîr prospetivis gnovis e originâls par fâ sì che lis gjenerazions plui zovinis a podedin disvilupâ sul teritori furlan lis lôr capacitâts e potenzialitâts.

E inte sô azion il puest de identitât lenghistiche al è simpri stât centrâl. Par esempi, cu la ativazion tal 1995 dal CIRF, il Centri Interdipartimentâl pe ricercje e il svilup de lenghe e de culture dal Friûl, istituzion che al à volût a fuart dilunc dal so mandât come Retôr. Il CIRF, che pôc timp indaûr al à riformât lis sôs strutturis, al à in mò un puest impuartant tal studi e tal svilup de culture furlane tal sens plui ampli.

Par lui un obietîf fundamentâl al è stât, tai diviers ambits di interès public e privât, il doprâ simpri la lenghe furlane: une lenghe e à di vê la capacitât semantiche e la flessibilitât par coventâ in ogni ocasion. Cun cheste prospettive, l'ûs dal furlan tal ambit sientific e tecnologjic al diventave basilâr.

Cussì, tal 2001, intant che al jere ancjemò retôr, Marzi al fonde, cun altris coleghis, la Societât Sientifiche e Tecnologjiche Furlane (SSTeF), che al à vuidât tant che president fin ae sô muart.

La istituzion de SSTeF e voleve, e e vûl, jessi une rispueste fuarte a une esigjence di svilup e cressite de lenghe furlane te modernitât, e chest al podeve jessi dome se nissun ambit al vignive escludût, soledut chel sientific e tecnologjic.

Ae domande se il furlan al pues jessi doprât te comunicazion sientifiche, la rispueste de SSTeF e je dal sigûr afermative. Lu mostrin la publicazion dal *Gjornâl Furlan des Siencis/Friulian Journal of Science*, riviste sientifiche par furlan e inglês, che e à vût il ricognossiment ANVUR par impuartantis areis dissiplinârs, la ativazion di altris iniziativis editoriâls, tant che la riviste di divulgazion sientifiche *Cîl & Tiere* – strutturade sul model de *Le Scienze* – e *Gnovis des Siencis* e lu mostre il Congrès Anuâl de Societât.

Dutis ideis e iniziativis che a partivin di Marzi.

E che par chês, nô o volîn dîti graciis, Marzi. Ma ti disìn graciis soreddut par vê vût la pussibilitât di colaborâ cun te par tancj agns, di cuant il Senât Academic Integrât al à elaborât il gnûf Statût di autonomie de Universitât dal Friûl, e po dopo la colaborazion a progiets di didatiche (par esempli, la convenzion pal dopli titul in viticulture e enologjie cun Trent, San Michêl al Adis, e la Gjermanie e je stade ativade sot dal to mandât di Retôr).

Intai ultins agns o ricuardìn cun plasê la colaborazion cun te te SSTeF.

Il to mût di fâ al jere simpri positîf, zentîl, disponibil a dâ fiducie ai colaboradôrs par podê tirâ fûr lis lôr cualitâts miôr. Tu jeris salt te discussion, ma simpri disponibil a scoltâ e ancje a cambiâ idee se ti convinceve l'argument a ti contrari, cence mai spaurîsi pes dificolcâtis, pes oposizions, cence rabiâsi, ma cirint simpri une buine soluzion. Insome, al jere biel lavorâ cun te, al è stât biel fin tal ultin.

Marzi, graciis e che il Signôr ti compagni.

Mandî.